



SAKSFRAMLEGG

Saksnr:	Utval:	Dato
11/2023	Formannskap/plan- og økonomiutvalet	17.01.2023

Sakshandsamar:	Arkiv:	ArkivsakID
Tore Henrik Øye		22/1337

SØKNAD OM TILSKOT FRÅ NÆRINGSFONDET TIL DRIFTSBYGNING FOR STORFE PÅ HØVIK I EKSINGEDALEN

Vedlagte saksdokument:

Godkjent byggrekneskap driftsbygning Høvik
Byggregnskap billagsoversikt
Byggregnskap egeninnsats driftsbygning
Søknad om tilskot til ny driftsbygning

Kommunedirektøren sitt framlegg til vedtak:

Formannskap, plan og økonomiutvalet (FPØ) løyver kr. 200 000,- i tilskot frå Vaksdal Kommunale Næringsfond til føretaket Dan Børge Høvik til oppføring av ny driftsbygning for storfe på gnr. 53, bnr. 3 Høvik i Eksingedalen.

Løyvinga er gjeve med bakgrunn i fondsvedtektene § 2 «Formål».

Tildelinga utgjer 3% av godkjent kostnad på 6 millionar kroner, og er innanfor øvre tilskotsgrense etter fondsvedtektene, jf. § 4 «Stønadsvilkår».

Tilskotet vert betalt ut etter innsendt sluttrapport med kostnadsdokumentasjon.

Løyvinga gjeld til og med 01.10.24. Etter dette vert tilskotet trekt attende.

Saksopplysningar:

Samandrag/konklusjon (kort om saka)

Vaksdal Kommunale Næringsfond skal nyttast til å fremje næringsføremål i kommunen, i tråd med fondsvedtektene § 2 «Formål».

Formannskapet-/plan- og økonomiutvalet (FPØ) er fondsstyre, og tildeler midlar etter innstilling frå administrasjonen.

Føretaket Dan Børge Høvik søker om økonomisk tilskot frå kommunalt næringsfond til del-finansiering av oppført driftsbygning for storfe på gnr. 54, bnr. 3 Høvik i Eksingedalen. Kostnaden

med tiltaket vart kring 6 millionar kroner. Bygget vart teke i bruk i 2020, fortrinnsvis til ungdyr og kalvar. Det er ikkje søkt om eit spesifikt tilskotsbeløp.

Kommunedirektøren finn at søknaden er i tråd med fondet sitt føremål om å fremje næringsverksemd i kommunen, og går inn for å løyve kr. 200 000,- i tilskot som delfinansiering av kostnaden med bygninga. Innstillinga er innanfor øvre tilskotsgrense på kr. 300 000,- per søknad, jf. § 4 i fondsvedtektene («Stønadvilkår»).

Bakgrunn for saka

Vaksdal Kommunale Næringsfond skal nyttast til å fremje næringsføremål i kommunen, inkludert primærnæringa. Prosjekt/tiltak som medverkar til nyskaping og moglegheit for sysselsetting, skal prioriterast, jf. fondsvedtektene § 2.

Fondsstyret, ved Formannskapet/plan- og økonomiutvalet (FPØ), fattar vedtak om løyving frå fondet, etter innstilling frå administrasjonen.

I søknad av 31.10.22 søker føretaket Dan Børge Høvik om økonomisk støtte til oppført driftsbygning for storfe på gnr. 54, bnr. 3 Høvik i Eksingedalen.

Føretaket driv med mjølke- og kjøtproduksjon, med kring 200 storfe og leveranse av om lag 420 000 liter mjølk og 20 tonn kjøt per år. Føretaket haustar grovfôr på om lag 20 gardar i Eksingedalen/Modalen, og har ein person i løna arbeid, i tillegg til seg sjølv. Om sommaren vert det leigd inn ekstrahjelp.

Det vart bygd ny produksjonshall (driftsbygning) på bruket i 2010, som erstatning for «gamlefjøs». Etter at søkjar overtok drifta i 2015, meldte behovet seg for påbygg, for å få meir plass/areal, samt å leggje til rette for ei meir rasjonell og effektiv drift. Tiltaket vart også gjennomført av omsyn til dyrevelferd og framtidig produksjonsauke.

Det nye påbygget stod ferdig i 2020, og er kring 670 m² stort, med avdelingar for kyr/kviger (35 bås plassar) og kalvar (plass til 40 stk).

Bygget vart kostnadsrekna til 6 millionar kroner. Innovasjon Norge løyvde kr. 1,5 millionar i utviklingsmidlar til tiltaket. Kostnadar ut over dette er eigen finansiering, hovudsakleg gjennom banklån.

Søkjar kontakta kommuneadministrasjonen om mogleg tilskot frå Vaksdal Landbruksfond til ny driftsbygning, men fondsvedtektene sine krav til grunnkapital, gav ikkje grunnlag for løyving frå fondet. Det har heller ikkje fram til no, vore tradisjon for å inkludere landbruket i forvaltninga av næringsfondet.

Formelt grunnlag:

- Vedteker for Vaksdal Kommunale Næringsfond, revidert av kommunestyret den 14.06.22.

Vurdering og konsekvensar:

Søknaden er vurdert å vere tilstrekkeleg opplyst for sakshandsaming og vedtak, jf. fondsvedtektene § 4 «Stønadvilkår». Søkjar innfrir kravet om å vere næringsdrivande, med registrert føretak i Brønnøysundregistrene, jf. § 2 fjerde avsnitt.

Kommunedirektøren vurderer at investeringa i ny driftsbygning samsvarer med næringsfondet sin intensjon om å fremje næringsføremål og næringsverksemd i kommunen, jf. § 2 i fondsvedtektene.

Søkjar viser stor vilje til å satse på landbruket som næringsveg, ved å investere i framtidsretta drift og utvikling, med stort krav til kapitalbehov. Drifta til søkjar tydar mykje for lokal matproduksjon, og utgjer ein viktig del av jordbruksverksemda i Eksingedalen og kommunen elles, både når det gjeld produksjon, ressursbruk, fagmiljø og kompetanse. Samstundes legg driftsbygninga grunnlag for ei drift i høve til krava frå styremaktene. Investeringa er i så måte med på å sikre og utvikle arbeidsplassane på garden og i jordbruket, saman med at den også involverer andre yrkesgrupper og tenestetilbod. Satsinga vil høgst truleg ha verknad for lokal sysselsetting i landbruket, som er eit vesentleg moment ved prioritering av tilskotsmidlar frå næringsfondet, jf. § 2 i fondsvedtektene.

Påbygget er som nemnd teke i bruk, og eit eventuelt tilskot frå næringsfondet vil vere etterskotsvis. Kommunedirektøren meiner at dette ikkje bør leggjast vesentleg vekt, og at ei tildeling av tilskot bør sjåast ut frå at Vaksdal Landbruksfond ville vore ei naturleg finansieringskjelde. Men vedtektene sitt høge krav til bunden kapital (1,7 millionar), gav ikkje rom for tilskot, og fondet var difor inaktivt i fleire år. Overføringa av fondskapitalen til næringsfondet har no gjort midlane tilgjengelege for primærnæringsa. I dette høvet vert det vurdert som føremålstenleg å sjå tidlegare søknadar til landbruksfondet i ljøs av dette, sjølv om tiltaka er gjennomførte. Det kan derimot vere naturleg å avgrense etterskotsvis tildeling til første søknadsomgang etter nedlegging av fondet, og at ein for framtida har fokus på tiltak som er under planlegging (før gjennomføring).

I følge vedtektene § 4 skal samla finansiering frå fondet, som hovudregel, ikkje overstige 30 % eller kr. 300 000,- av den totale kapitaltrongen for eit prosjekt. I gjeldande sak går Kommunedirektøren inn for å løyve kr. 200 000,- i tilskot til tiltaket, som utgjer 3 % av byggjekostnaden. Det vil eventuelt vere opp til fondsstyret å gjere ei annan vurdering.

Innstillinga til stønadsbeløp er vurdert opp mot andre innkomne søknadar, saldoen til fondet og tilgjengeleg fondskapital.

Konklusjon

Kommunedirektøren gjer framlegg om å løyve kr. 200 000,- i tilskot frå Vaksdal Kommunal Næringsfond til oppført driftsbygning for storfe på gnr. 54, bnr. 3 Høvik i Eksingedalen. Tildelinga vert vurdert å vere i samsvar med fondsføremålet, jf. vedtektene § 2.